

Date – 21/02/2026

Time - 18:30 -18:40Hrs

## AKASHVANI AIZAWL

### REGIONAL NEWS BULLETIN

#### HEADLINES ( EVENING )

1. MZP, College SU leh Hnampual e'n tukin khan Aizawl khawpui chhungah hnamdang ILP an endik, ILP neilo leh fello mi 60 chuang an hmuchhuak.
2. Art & Culture Department bultumin tukin khan Ekta Diwas Unity Run & Cycling chu Aizawlah buatsaih a ni.
3. India leh Brazil chuan kum nga lo awm tur chhungin dollar tluklehdingawn 20 hu a sumdawna tihlen an remti.
4. Prime Minister Narendra Modi chuan naktuk Pathianni chawhma dar 11 hian 'Mann Ki Baat' programme a hmang leh dawn.

<><><>

#### MZP

Mizo Zirlai Pawl (MZP), College SU leh Hnampual hruaitute'n tukin khan Aizawl khawpui chhungah hnamdang te neih tur Inner Line Permit(ILP) an endik a, ILP neilo leh fello tam tak an awm tih hmuhchhuah a ni.

Aizawl khawpui chhung Kulikawn, Dawrpui (Bazar), Vaivakawn, Bawngkawn-ah te hnamdang danlo a rawn lut an check a, ILP neilo emaw fello mi 68 man niin, thuneitute kutah hlan nghal an ni.

MZP hruaitute chuan, Dan lo a hnamdang dapchhuahna ah hian kum reilote chhungin thil inthlak danglam tam tak a awm thu an sawi a, hnathawk tura kal a tam zawk hi Assam registration lirthei khalhin, Liscence neilo a khalh an awm a, Aizawl leh a chhehvela lirthei khalh an tam ta lutuk pawh an vei hle tih an sawi.

Heng bakah hian, ILP a in ziak, Purpose of Stay nen a inmil lo lutuk a hnathawk awmte pawh tam tak man an ni a, hnamdang leh hnamdang in sponsor 7 man an ni bawk a, hemi chungchangah hian sawrkar thuneitute pawh hma la nghal tur leh ILP pekchhuah kawngah a ti diklo tu an awm anih chuan, chhui chhuaha hremna pek ngei MZP chuan an phut tlat bawk a ni.

MZP chuan, Sairang thlenga rel alo luh tak avangin, mizo mipuite pawh harh thar a, mahni awm hmun theuh ah ILP check uar tur leh an chhawr te ngei pawh an fel fai em tih en nawn fo turin a ngen a ni.



## ADVISER TO CM

Adviser to Chief Minister (Implementation of Handholding Scheme) Dr. KC Lalmalsawmzauva chuan ei leh bara intodelhna tur leh kuthnathawktute thlai tharchhuah man man zawka tihral thin a nih theih nan Mizoram Sawrkar chuan Bana Kaih Scheme chu tangkai takin a hmang mek a ti.

Vawiina Aizawl I&PR Auditorium-a sorkar laipui Ministry of Food Processing Industrieshnuai Federation of Industry & Commerce of North Eastern Region (FINER) bultuma 'Regional Interaction Meet of Food Processing Industry' buatsaih a hmanpuinaah he thu a sawi a. Kuthnathawktute thlai tharchhuahte vawn that nan leh him dam taka thawnchhuah nan thutkhawm thupui 'Packaging' chu thil pawimawh leh tangkai tak a nih thu a sawi.

Eitur leh bungrua tuamna te chu a chhung ami a vawn that mai bakah customer-te hipna pawimawh tak a nih thu sawiin, a leitu tur ten an hriattur pawimawh tak tak tarlanna a nih bawk thu a sawi a. Ei leh bara intodelhna turin leh kuthnathawktute thlai tharchhuah man man zawka tihral thin a nih theih nan Mizoram Sawrkar chuan Bana Kaih Scheme chu tangkai takin a hman mek thu a sawi a. Phase -1 ah kuthnathawktuten Bana Kaih Scheme hnuai thlai thlan chhuah bik, Sawhthing, Aieng, Hmarchate leh Hmunphiah thar chhuah kawngah hmasawna hmuh a nih thu tarlangin, Phase 2 ah hian thlai tharchhuahte tha taka sawngbawl hna, 'Processing' ah tan lak chhoh zel tum a nih thu a sawi a ni.

Dr. KC Lalmalsawmzauva tarlan danin Bana Kaih Scheme Phase 1 kalpui chhung khan Progress Partner 392 hnenah Loan pek a ni a, Progress Partner 2713 hnenah CM Special Package sem chhuah a ni bawk a. Phase 2 kalpui mekah hian Progress Partner 917 te thlan chhuah an ni leh tawh a, Progress Partner tha leh rintlak thlan chhuah hna hi kalpui chhunzawm zel a nih thu a sawi a ni.



## EKTA DIWAS

Art & Culture Department bultumin tukin khan Ekta Diwas Unity Run & Cycling, a huhoa tlan leh thirsakawr khalh hun Aizawlah an hmang.

Art & Culture Department Deputy Secretary Pi Lalengvarin Vanapa Hall atangin Run & Cycling hi a vailiam a. Run & Cycling-a telte hi an tlanna kawng an zawh hnuah Vanapa Hall-ah kir lehin kharna hun hman a ni.

He hun hmanpuitu zinga mi IGP Pu Seju P. Kuruvilla chuan thu sawiin, India ramin inremna leh thawhhona tha a mamawh thu a sawi a, hemi bakah hian thawkho tur chuan hriselna ngaih pawimawh a tul thu sawiin, Unity Run & Cycling-a tel zawng zawngte chu taksa enkawl tha theuh turin a chah a ni.

VC

*Sorkar laipui chuan State leh Union Territory zawng zawngte Union Home Minister hmasa ber leh Iron Man of India tia hming an vuah hial Sardar Vallabhai Patel pian champhaphak kum 150-na hriatreng nan October ni 31, 2024 leh October ni 31, 2026 inkara hun hman dan tur hrang hrang a duang a. Hemi hnuai hian Ekta Diwas thupui 'One India, Self-Reliant India' tih hmangin Art &*

*Culture Department chuan Unity Run & Cycling chu Mizoram Cycling Association leh Aizawl City Run Club te thawhpuiin a buatsaih a. Mi 140 vel tlanin, Cyclists mi 55 an tel bawk a ni.*

<><><>

## **METH SEIZED**

Cheng Nuai 289 man hu ruihhlo Methamphetamine ni ngeia ngaih chu Lawngtlai Police leh Assam Rifle tangkawp ten nimin tlai khan an man.

An thudawn bawhzuiin Police leh Assam Rifle te hian Lawngtlai District, Kakichhuah ah, Myanmar lam atanga Lawng rawn lut chu enfiahin ruihhlo hi an man a, a neitu ni a hriat mi pathum leh ruihhlo an man hi vawiin khan Lawngtlai Police Station thlenpui a ni a, Ruihhlo neitu a puhte hi Myanmar lam mivek niin kumtlinglo an ni an, Myanmar ram, Mawngdaw District leh Maubra District mi niin an insawi.

Methamphetamine ni a ngaih an man hi a vaiin Kg.3.619 a mo an, Lawngtlai Police ten an sawidanin, ruihhlo an man hi International Market Rate a chhutin Cheng Nuai 289 man hu a ni.

Hetihlai hian Central YMA chuan kar hmasa chhung khan Heroin hawng 33 an man a, hemi kaihnawihah hian mi 41 man an ni bawk.

Central YMA hnuaia CADS chuan February ni 14 leh February ni 20 inkar khan No. 4 : Hawng - 33, Tictac bur – 38, damdawi thahnem tak bakah Ruihhlo kaihnawihah hian mi 41 an man tel a, Excise and Narcotics kutah mi 4 hlan an ni a, Home ah mi 3 dah luh an ni bawk a ni.

<><><>

## **MLDB**

Vawiin hi International Mother Language Day ani a, Mizo Language Development Board (MLDB) in India Constitution Eight Schedule-a Mizo tawng dah a ni theihna tura an hmalak dan i lo ngaithla ang.

## **VC**

*Mizo Language Development Board hian India Constitution Eight Schedule-a Mizo tawng dah tumin Study Group a din a, tlawmngai pawl hrang hrang leh Mizo hnam peng hrang hrang thalai pawla an hruaitute pawh kawmin an inlungual hle tih an sawi a. Sorkar leh mipuiin an thlawp that bawk thu sawiin hma an lak zel dawn thu leh beisei pawh an neih san viau thu an sawi a ni.*

*MLDB Secy Pu R Lalsangpuia chuan Eight Schedule-a Mizo tawng a awm chuan Mizo mipuite tana a thatna tur tam tak a awm thu an sawi a. Official language dinhmuna hlankai a nih chuan India rama exam hrang hrangah Mizo tawnga chhan theih a nih dawn thu sawiin Indian Information Service Group B Gazzetted bikah pawh Eight Schedule-a tawng awm te chu an luh zat zat thu leh Mizo tawng a awm ve loh avangin lut an la tlem thu an sawi a. Sahitya Academy hnuaiah pawh Mizo tawng humhalh nan kumtin Eight Schedule hnuaia awm ten an dawn ang lawmman a awm ziah theih dawn thu te sawiin Mizoram sorkarin kan tawng humhalh mai tawh loin sorkar laipuiin a humhalh a ngaih tawh dawn thu an sawi a, tawng mai bakah Mizo culture thlengin a humhalh hna chu sorkar laipui kutah a innghat thui tawh dawn hle tih an sawi a ni.*

***Byte of R. Lalsangpuia, Secretary, MLDB***

*Eight Schedule-a awm turin tun dinhmunah Mizo tawng telim tawng chi hrang hrang 38 atan dilna thlen mek a ni a. Tehna hrang hrang atanga chhutin Mizo tawng chu a beiseiawm pawl a nih theih thu MLDB hotute chuan an sawi a ni.*

<><><>

**AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

**NCC**

Lunglei-a din thar, 2 Mizo Battalion National Cadet Corps (NCC) atanga cadet 8-te chuan January thla khan New Delhi-a Special National Integration Camp (SNIC) neihnaa Republic Day Parade Contingent-ah telin, Prime Minister's Rally-ah cheraw an kan a ni.

Hei hi Mizoram chhim lam atanga NCC cadet-te Prime Minister's Rally-a an tel vawi khatna a ni a, Larsap chuan cadet 8-te hi March ni 3 khian an inpekna, inthununna leh Mizoram hmingthatnaa an thawhhlawkna avangin chawimawina a hlan dawn a ni.

2 Battalion NCC Commanding Officer Col Sagar K Mohanty-a chuan thu sawiin, he hlawhtlinna hriatrengtlak hi a huhova thawhrimna leh inpekna nget tak rah a ni a ti a. Zirtirtute leh zirna inte kaihhruaina leh thlawpna a fak bawk a, he hlawhtlinna chhinchhiahtlak hian Mizo thalaite theihna sanzia leh NCC unit din tharte thatzia a lantir a ti a. Hei hian Mizorama thalaite chu NCC zawm a, ram hmasawna leh inpumkhatna atana awmze nei taka tha thawh tura a chawh phur ngei beisei a ni.

<><><>

**INDIA & BRAZIL**

India leh Brazil chuan kum nga lo awm tur chungin dollar tluklehdingawn 20 hu a sumdawna tihlen an remti. Prime Minister Narendra Modia leh Brazil President Luiz Inacio Lula da Silva te chu vawiin khan New Delhi-ah ram pahnih chungchangah an inkawm a. He hunah hian India leh Brazil inkara thil pawimawh zau takin an sawi duh a. Hruaitu pahnihte chuan ram pahnih inkar bakah khawvel thilthelng pawimawhte an sawidun a. Thuchhuah intawm an siamah Prime Minister Narendra Modia chuan India leh Brazil inlaichinna chu President Lula kaihhruaina hnuaiah nasa takin hma a sawn a ti a. Kum nga lo awm tur chungin dollar tluklehdingawn 20 chuangin sumdawna tihlen an rel a ti bawk.

<><><>

## **UNION HM**

Union Home Minister Amit Shah chuan thlaleh ni 31 atang chuan ramchhunga Naxal helho nuai chimih vek an ni ang a ti. Vawiina Guwahati-a CRPF Raising Day vawi 87-na a hmanpuinaah he thu hi sawiin Pu Shaha chuan CRPF te chuan ram rawngbawl hna ropui tak an thawk a ti a. Ramchhunga Naxal helho do na kawngah CRPF sipaite leh Cobra Battallion te an thawk tha hle a ni a ti bawk.



## **PM MANN KI BAAT**

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 130-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

